



Digitized by the Internet Archive  
in 2016





TRACTATUS  
Ioannis Giacchetti Presbyteri Serrani.

**Imprimatur si videbitur Reuerendiss. Patri  
Mag.Sac.Pal.**

*A. Episc. Bellicastren.Vicesg.*

*Imprimatur,*

**Fr. Hyacinthus Lupus Socius Reuerendiss.  
P. Mag.Sac.Pal.ac totius Ord.Præd.Vica-  
rij Apostolici.**

REGI SECVLORVM  
IMMORTALI, ET INVISIBILI  
SOLI DEO  
GLORIOSÆ, ET BENEDICTÆ  
SEMPER VIRGINI  
MARIAE  
BEATO IOANNI BAPTISTÆ  
PRAECVRSORI  
SE, AVCTOR, ET OPVS

D. D. D.



*AVCTORES, QUI CITANTVR  
in toto Tractatu.*


- |                       |                        |
|-----------------------|------------------------|
| <b>A</b> Brahamus Or- | Eusebius Cæsarien.     |
| terius.               | Euagrius.              |
| Adrianus Papa.        | Frodoardus.            |
| Ado Episcopus.        | Franciscus Gonzaga.    |
| Agapitus II. PP.      | Genesis.               |
| Alphonfus Tostatus.   | Gelasius Papa.         |
| S. Ambrosius.         | Glaber Rodulph.        |
| Ammianus Marcell.     | S. Hieronymus.         |
| Anastasius Biblioth.  | Honorius IV. Papa.     |
| Antonius Democh.      | Hymnus de Virginib.    |
| Beda Presb.           | Iacobus Gratserus.     |
| Bonifacius IX. PP.    | Iob.                   |
| Breuiariũ Eccl. Aug.  | S. Io. Apost. & Euang. |
| Cantica canticorum.   | Ioseph Hebræus.        |
| Cæsar Card. Baron.    | S. Io. Chrysostomus.   |
| Cæsar Franciottus.    | S. Io. Damascenus.     |
| Cedrenus.             | Ioannes Molanus.       |
| Claudius de Rota.     | Ioannes Marianus.      |
| Conc. Nicæn. 2.       | Io. Matthæus Caryo-    |
| Concil. Rom.          | phalus.                |
| Curopolates.          | Isaia Proph.           |
| S. Cyprianus.         | Isidorus Episc. Hisp.  |
| S. Ephren Diaconus.   | S. Leo Papa.           |
| Eutropius.            | Lippomanus.            |
|                       | S. Lu-                 |



*Index Auctorum.*

5

S. Lucas Euangelista.	S. Remigius.
Lucas Vuadingus.	R. Card. Bellar.
Machab.	Ruffinus.
S. Matthæus Apost.	Seneca
& Euang.	Sigibertus.
S. Marcus Euang.	Socrates.
Martyrol. Romanū.	Sozomenus.
Marianus Scotus.	Stephanus IV. Papa.
Menologium Græcū.	Stephanus Durantus
Metaphrastes.	Suidas.
Nicephor. Callistus.	Surius.
Nicephor. Constantinopol.	S. Thadæus Apost.
Pfal. 30. & 131.	Tertullianus.
Paulus I. Papa.	Theatrum terræ sanctæ.
Pancirolus.	Theophanes.
S. Petrus Chrysolog.	Titus Liuius.
Petrus Garzia.	Thomas Bozius.
Petrus Martyr.	Vgonius.
Philippus Ferrarius.	Virgilius Maro.
S. Prosper.	Vsfuardus.
P. Lentulus Consul.	Zonaras.



# INDEX CAPITVM ICONOLOGIAE

SALVATORIS.

**D**E veritate non manufactæ Imaginis, deque insignioribus ab ea mirabilibus ostensis. Cap. I.

De Translatione Imaginis è Ciuitate Edessa Constantinopolim. Cap. II.

De Translatione eiusdem, Constantinopoli in Urbem Romam, & in Ecclesiam S. Siluestri. Cap. III.

De huiusmodi secundæ Translationis probatione. Cap. IV.

De alijs testimonijs circa hanc in Urbem translationem. Cap. V.

De Auctioribus asserentibus, deque alijs considerationibus, & indicijs. Cap. VI.

De simillima uniformitate Sanctæ istius Imaginis cum alijs à Christo Domino miraculose efformatis, ac de notabili paritate eiusdem cum relatione Auctiorum, qui de humano aspectu Domini scripserunt. Cap. VII.

De disparitate aliarum humani artificij figurarum, deque causa talis disparitatis pro nostra affirmatione non manufactæ Imaginis. Cap. VIII.

# ICONOLOGIA<sup>7</sup> SALVATORIS

*sive*

DE SACRA, ET VENERABILI  
Imagine Christi Domini Nostri  
Saluatoris

T R A C T A T V S.

*De veritate non manufactæ Imaginis,  
Edeffenæ, deque insignioribus ab  
ea mirabilibus ostensis.*

*Cap. I.*



PECIE augustissimam, maie-  
state venerabilem, & considera-  
tione quasi diuinā Christi Do-  
mini Nostri Saluatoris Imagi-  
nem, ante tempus passionis ab  
eodem mirabiliter impressam, & Abagaro  
Regi Edeffæ in Syria, Christum videre cu-  
pienti missam, absconditā fortasse à deuotio-  
ne pleriquorū aliunde turbatorum, quos pro-



pè loquitur Propheta Psal. 36. *Abscondes eos in abscondito faciei tuæ à conturbatione hominum*, suo tamen lumine signatam, suis interdum mirabilibus coruscant hic primò tractatus enarrat.

Sanctum Domini Præcursoris Caput, magni depositum Baptistæ, omnium Ecclesiarum deuotioni charissimum, verarumque historiarum argumento notissimum, deinceps exponet. Ac quamobrem ex Orientalibus oris vtrumque fuerit Romam translatum, & in Ecclesia Sancti Siluestri de Capite asseruetur; quantum ex monumentis veridicis percipitur, apertiora testimonia breuiter percontabitur.

Primo itaque cum huiusmodi sacræ non manufactæ Imaginis historia tantopere à veridicis grauibsq. affirmetur Auctoribus, ut proinde à cunctis sine hæsitazione sit recepta; immo cui dissentiri, temeritas; & non admittere esset improbitas (sicuti Casaubonum contra effutientem, doctè pièq. refellit Græferus in Syntagm. de imaginibus manu non factis) non modica coniectura probatur, indictam gentibus, & confirmatam primitus fuisse Imaginem ab Apostolo Christi Thadæo cumque non calamo, sed lingua, non literis,  
sed

sed ore, & extenso quasi digito Sanctissimæ huius figuræ confirmasse veritatem. Siquidem Eusebio, & Hieronymo testatibus, Apostolus Thadæus perrexit Edessam, ac ibi, quam viderat à Domino imaginē fieri mirabiliter, iterum apud Regem aspiciens, testimonium omninò perhibuisse percreditur. Dignoque Apostoli ore de Sacratissima hac Icone tunc traditio inoleuit; & taliter confirmata vndequaq. recepta est.

Nec ideò mirum, si tantam Regis credulitatem, & fidem atq; Christi obsequium, munusque, nec ipse, nec alius scripsit Apostolorum: si memores quod D. Ioannes in Evangelij sui fine conclusit: *Sunt, & alia multa, quæ fecit Iesus, quæ si scribantur per singula, nec ipsum arbitror mundum capere posse eos qui scribendi sunt libri.* Cuius auctoritate (pro, tacitæ forsan consimilis obiectionis responso) nitebatur Stephanus Papa in Concilio Romæ habito pro Săctarū Imaginū adoratione. Etenim Săctissimus Pōtifex, inexpugnabile pro sanctarū figurarū adoratione argumētū in huius Săctissimæ Iconis historia fundavit. Christus enim dum Săcti Vultus sui figurā expressit, eamq. Abagaro misit, non abnuitt Regem; aliosvè fideles eā in posterū esse adoraturos.

Propensius itidem hanc asserimus veritatem Imaginis; ex eo quod Matth. capite 4. habetur Christi miraculorum famam in vniuersam abiisse Syriam in qua erat Edessa. *Et abiit opinio eius in totam Syriam, & obtulerunt ei omnes malè habentes varijs languoribus, & tormentis comprehensos.* Hos inter Rex Edessæ tunc reperiiebatur Abagarus infirmus, sed occasione languoris pro deuoto credulitatis officio, litteræ ingenti fide, humilibusq. precationibus plenæ ab eo missæ fuerunt ad Christum Redemptorem. Rursumque Dòmini ad Abagarum responsio, pijs cælestibusq. referta promissionibus commemoratur. Planè hoc Sanctus Ephren Diaconus Edessenus in opusculo testamenti, ac Theodorus Studita in Epistola ad Paschalem Papam contestantur, imo alij, quorum meminit Card. Baronius tom. 1. Annalium anno Domini 31.

Perrexit enimuerò Apostolus Edessam, & vt Eusebius refert lib. 1. cap. 13. Regi ægro, & deprecāti, gratiarum suauitates in nomine Domini, in quem mirificè credebat, impertit. Verùm haud silentio prætereundum, quam læto corde, quam hilari fronte Discipulum Christi recepit Abagarus, qui expectato præ-

cibus



cifus tēpore, quem tandē suscepit, diū parabat hospitari. Promiserat siquidem Christus ex suis aliquē esse missurum, quē aliquando visum tenuit ingenti deuotionis affectu. Sed ò quàm deuotè, credimus prouoluebatur ad pedes, ò quàm instanter inuitabat ad narrandum de Domino, deque suorum mirabilium expositione vrgebat. Atque in colloquijs, tãquã secreti in Ara sacelli eminebat hæc Christi Domini Imago Sanctissima, in quã oculos mentesq. attollētibus, gaudium solatiumque oriebatur, ac præsidium.

Porro si coenaculi, si caluarij, si sepulchri, ac huiusmodi loca permulta, post Domini Resurrectionē à Discipulis Christi tenero deuotionis affectu, sanctificata, honorata, celebrata fuere. Imò Apostolico inceptus exēplo, Apostolicaq. indictus traditione adhuc eiusdem visitationis, & venerationis talium, similitumq. locorū perseuerat vsus, & vota: quid pro ea nō excogitarēt efficere quæ Domini, & Magistri viuã quasi præsentiam exhibet, & vultus illius maiestatem ostendit? Ac si Regis David hortamur impulsu, locum adorare vbi steterūt pedes eius, quē Saluatorem prophetans intendebat. Psalm. 131. Quare non ampliori pietate adorandum, haud pedum, sed

Sacratissimi Vultus impressionē, dignāq. figurā?

Vehementius igitur Rex, Edesseniq. fideles deuotissimā Christi Imaginē coluere, Apostolico ad colendā verbo & exemplo instructi. Magnificatus fuit illicò venerabilis honos imaginis, ac deuotio. Fama etiam de mirabilibus crescens, toto primum orienti diffusa, Christiano deinceps illuxit Orbi. Hinc eloquijs prædicauere Patres; hinc scriptis notarunt sapientes; quos fideliter colligit, refertq. Gratserus in Syntag. cap. 5.

Hos inter, duo Sacrosancta Concilia testantur. Nicænum secundum, trecentorum Episcoporum & amplius, à quibus vnanimiter hæc tum in Oriente asseruata, probatur Imago, ob quæ tres Patriarchæ orthodoxi Orientales tunc scripserant luculenter: & profectò quam fideliter recepta fuere quæ dicebantur, de ista, atque omnium Sanctarum Imaginum adoratione. Horum enim meminit Euaagrius Scholasticus lib. 4. historiarum cap. 26. & in actis eiusdem concilij actione 5. registrantur.

Idem Concilium Romanum sub Stephano Papa, qui Sanctissimus Pontifex, sacro sedente Concilio de hac præsertim Imagine Christi Sacratissima ( adhuc apud Orientales

custodita) quàm optimè perorauit; ob ea-  
quæ tres Otientales Patriarchæ ad Paulum  
Papam scripserunt; Theodorus scilicet Hie-  
rosolymitanus, Cosmas Alèxandrinus, &  
Theodorus Antiochenus, vti refert Adrianus  
Papa ad Carolum Imperatorem in Apologia  
de Imaginibus. In his ergo sacrorum Antisti-  
tum Synodis, ac venerabilium Orthodoxo-  
rum Comitijs, huius Sanctæ Christi Imaginis  
ad Abagarum missæ historiam, ac miracula  
perinsignia, sãcti Episcopi congregati, Sacer-  
dotes sacri, ac Patres orthodoxi recipiendo  
fidelissimè probauerunt. Idque noua Conci-  
liorum editione tom. 3. cap. 18. refertur, &  
in Annalibus Card. Baronij tom. 9. Ann. 769.  
sed prolixius explicant loco prædicto Eua-  
grius, S. Ioannes Damascenus de fide ortho-  
doxa lib. 4. cap. 17. Nicephorus historiarum  
lib. 2. cap. 7. Metaphrastes in actis Samonis,  
& Gurixæ die 15. Nouembris, Claudius de  
Rota in vita Sancti Alexij 16. Iulij, Surius 16.  
Augusti. Durantus de ritibus Ecclesiæ Ca-  
tholicæ lib. 1. cap. 5.

Præter hos Illustris memoriæ Auctores,  
duo tantum celebriora miracula (veluti duo  
luminaria in tot perspicuarum historiarum, &  
inclitarum auctoritatum firmamento) memo-  
rabun-



rabuntur. Alterum aduersus Chosroam Persarum Regem, eiusq. impias phalanges cum contra Edeffam ( Sanctæ tunc Imaginis habitaculum, atque Sacellum ) impetu irruerent. Mirabilis tunc Imago Saluatoris in tali Edeffanorum angustia copias militum, militumq. Ductorem dispersit omninò, ac fugauit potenter. Vti refert iam dictus Euagrius lib. 3. 4. quem ita probabiliter edicentem, Nicæni Concilij Patres adeò confirmarunt; vt contra nefariam Iconomachorum hæresim, pro sanctarum Imaginum adoratione stabilire sententiam.

Alterum quippè miraculum sub Mauritio Imperatore, & Philippico Duce, is quidem securus de patrocinio, eam secum duxit in Castra, & ecce contra Persas quoque potentia cœli visa fuit. Ex Imagine enim hac rutilante corruit exercitus infidelium bellatorum. Refertur in historia Miscellanea lib. 17. & à Baronio tom. 1. Anno Domini 31. Grats. cap. 6. & 7. quamobrè perspicuè considerandum est, non vni, aut aliquibus, non domi, aut vico, sed sub dio, & in campestribus, apud Castra, & milites, in conspectu Imperatorum, & Ducum, coram exercitibus & turmis visa, recepta, & conclamata fuere huius non manu-

nufa-

nufactæ Imaginis miracula celebriora. Solus Casaubonus tot inter cecutijt, nempè vt Harpastis de domo Senecæ caligauerat. Hæc (vt refert ep. 50) orba luminibus, domi lucem non oriri, ob fatuitatem dicebat; ille cæcus animo, ob impietatem manifestissima non vult credere.

Sacrofancta itaq; cælestis Imperatoris Imago ad castra perducta (vt quoddã Arca Dei uiuentis contra Philistæos) audaces in bello, suos visa est reddere deuotos, extemploque facere confidentes, hisq; insolitam infundere virtutem, præstare vigorem, nondum expertam adijcere fiduciam, viribus quoque fortiter implere. Inimicos autem (ferreos acresque licet,) ægros inconstantesq; vacillare; subitis circumdari tenebris, languidos sudantesq; debilitari; animo exturbari. Illico acclamanti fidelium exercitui virium incrementa, victoriamq; cumulauit. Quod si splendore armorum filiorum Israel gentes idolatræ dissipabantur. *Refulsit enim Sol in clypeos aureos, & æreos, & resplenduerunt montes ab eis.* Machab. 1, cap. 6. Vnde postmodum fortitudo gentium territa, debellata fuit: quantò magis splendidissimæ huius Imaginis claritate mirabili

bili, gens pessima, & infidelis dissipata interiit eodem ferè modo quo Isaias 30. prophetando minabatur, *mille homines à facie terroris unius fugietis*. His itaque mirabilibus Imperator cælestis suam augustissimam, mirabilemque figuram edocet à fidelibus coli, & ab inimicis tantopere debere formidari.

*De Translatione Sanctæ Imaginis  
Edeßæ Constantinopolim.*

*Cap. II.*

**Q**Vousque autem (ad nongentos scilicet annos) Sanctissima hæc Imago permāsit Edeßæ in Syria, tūc isto Ciuitas munita præsidio, veluti ope protecta diuina, cælestiq. asseruata custodia, ab hostiū turmis mirabiliter liberata, ab exercitibus intacta, atque à malorū calamitatibus haud oppressa existerat, quin potius omni prosperitate redundās, toti penè Orbi præstabat, effulgebatq. vehemēter. Testatur enim verò, nō verbo sed exemplo S. Alexius Cōfessor: qui Roma Edeßā peragrans, istam visitaturus tetendit Imaginem, de cuius peregrinatione multi scribunt, sed explicitius  
Clau-



Claudius de Rota in sua collectiua legēdarij.

Sed vt mos est inter mortales , pro huiusmodi deuotionis prærogatiua, inuidia serpsit Ciuitatibus, potentatum culmine præditis, inclitæ tamen Imaginis haud conseruatione dignatis , vel patrocinio communitis . Igitur post multas importunæ petitionis vrgentes finitimorū Potentatum efflagitationes, tandē Romani exercitus Edessa vallo circūdata, vt refert Curopalates apud Baronium tom. 11. ann. 944. non quidem contra Romanos, potentissima tunc propugnauit Imago , sed terribilis potentix furore sedato, quæ olim inimicos verberabat exercitus, reddita placidior , non terruit vt hostes , sed eorum forsā intuebatur, deuotionis affectum; qui vt in patria haberent sicut in corde, zelus , ac fidei permotione compulsi abnegantium expugnabant munimina Edessenorum . Vel summi Dei ordinatione disponderetur , vt celebri terrarum loco , celeberrima Christianorum reponeretur Imago . Sicuti ipsemet Imperator Constantinus porphyrogenitus in huiusmodi Iconis oratione credens inscripserat . *Postquam ad hanc Urbium Reginam undiq. confluere, quæ sunt optima, & pulcherrima, eratque Dei voluntas hanc quoque sacram*

*Imaginem hic recondi cum alijs thesauris.*

Aut idem Altissimus inscrutabilis suæ intuitu prouidentiae, primarios, verosq. & loci, & nominis, Romanos, idest Occidentales aspiciens, deuotos Imaginis præuidebat futuros, eiusq. aliquando cultores. At ad quid dixi futuros? imò & Constantinopolitanis priores; nostrorum siquidem Romanorum. Alexius nobilissimus pergens Edeffam, primitias adorationis obtulit pro patria Roma. Et sicut publicanorū Principi Zaccheo præcurrenti in via qua transiturus erat Iesus, pro tanta præcurrentis fide, domus suæ Iesum recipit hospitio. Ita Princeps Romanorum Alexius, suorum præcurrens deuotionem, inuitationemq. meruit in futurum sacrosanctam hanc in sua patria custodiri Imaginem.

Afflicti igitur tunc Edeffeni eo quod superni numinis protectione carebant, æstimantes summi Dei voluntate permittente, sanctissima eos priuari Imagine, Imperatoris Constantini dicti porphyrogeniti, pacem in tot calamitatibus quæsiere. Ac tam pro Edeffa, quàm finitimis locis dignarum postulationum iura paciscentes. Gloriosam ad Abagarum datam Imaginem, tantopere petitam liberanti sponponderunt. Sed antequam  
italia,

talia, vel inuiti pollicerentur. Ocius quidem solita tentasse effugia, & opem ab Imagine potentissima quæsisse, credi fas est.

Mox etenim Imperator obsidione soluta, Edessaque liberata, pacti memor, ac deuotione perfragens, cælestisq. huius muneris velox exactor, pompa solemni, comitatu regio, ac ductu sacrationi per manus Episcoporum, & Sacerdotum hanc sacrosanctam Imaginem Edessa Constantinopolim transferendam curauit. Cuius mirificæ translationis testimonia astruunt in primis ipsemet Imperator in celebri oratione quam de hac sanctæ Imaginis asportatione Edessa Constantinopolim, notatis dierum, locorum, personarumque ac totius itineris circumstantijs scripserat loculenter, quæ registratur à Metaphraste sub die 10. Augusti, atque Curopalates, Frodoardus in eorum historijs, refertur

etiam tom. 3. Concil. Menologium

Græcum die 16. Augusti

meminit quoque

Baronius tom.

10. ann.

944.



*De eiusdem sacra Imaginis translatione  
Constantinopoli in Urbem Romam.*

*Cap. III.*

**I**Bi quidem usquequo Ciuitas Constantinopolitana fide alacris, & Imperio felix; Principes teneret pios, Ciues autem sancta deuotione fideles, Imago sanctissima, crebris effulgendo miraculis, ad non multos perseuerauit annos. Cum verò Constantinopolis nec sibi, nec Deo constans, sed in fide vacillans, animarum fuit prostituta Tyranno, & suaue Christi iugum abijciens, cepit barbara exactoris diaboli pondera sustinere. Tunc orthodoxi fideles, quorum Deus tetigerat cor, & nomina scripta erant in libro vitæ, semen seruorum Dei, à barbarorum, & hæreticorum clade seruati, & à fermento malitiæ, & nequitie immunes (vt olim Angeli Babylonem Hierem. 51. & nouissimè Hierosolymam Ioseph lib. 7. cap. 12. de Bello Iudaico) Patriam iam denigratam super carbones, cum lachrymis linquentes, vt securiora peterent effugia, ad Ciuitatē refugij, ad matrem credentiū, ad almam Urbē sub tegmine alarum magni Pastoris vnanimiter confluere.

Porrò

Porro inter moestæ transmigrationis postrema solatia ex prætiosissimis totius Orientis thesauris (sanctorum scilicet reliquijs) sacratissimam istam secum portauerunt Imaginem. Antiquioris exempli disciplinam edocti, & interioris gratiæ lumine, prouidentia ordinante, illustrati. Vti quondam filij Israel ab Aegypto ossa Ioseph in terram promissionis, Gen. cap. 5. Christiani quoq; in Hierusalem degentes, belli fuga asportauerunt suppellectilia Ecclesiæ, Eusebius lib. 7. hist. cap. 14. apud Bar. tom. 1. ann. 68. cap. 19. Et exules Aphricani crudelitate Vuandalica extorres in Sardiniam Insulam D. Augustini corpus asportauerunt. Sigib. Mar. Scot. in cron.

Hoc Sanctorum suorum triumphali vehiculo, quod sancti Patres, equis igneis, curruque igneo Heliæ affatim digniores, animo trahebant, sancta Imago porta est Romam. Hac processione mortificatorum in Domino religiosorum celebrata est translatio illius. Isto venerabilium Patrum sacro famulatu ducta fuit Constantinopoli Romam. Hisce animarum afflictarum propter verbum Dei, veluti incenso, & sacrificijs litabatur in via. Talibus etiam holocaustis spirituum tribulatarum honorabatur quotidie; & tandem ut

Aræ Dei per Salomonem translatae oues, & boues absque numero immolabantur in via, 3. Reg. cap. 8. Ita cordis contriti, & humiliati sacrificio sacrationi iugiter colebatur, dum portaretur ad Syon supra montes positam, ad turrin mille clypeorum, ad patriam refugij, ad caput Orbis, Romam inquam, taliter Deo disponente, & permittente.

Quod si Gentibus Idolorum cultoribus curæ erat in transmigrationibus secum ducere idola, & asportare penates nondum prospero temporis statu, sed ruinarum quoque urgentibus præssuris, adeo ut non prius sua, suorumque incolumitate prospècta, illis studebant ( falsa religione ) seruandis. Hinc legitur Aeneidos 2.

*Sacra suosq. tibi commendat Troia penates.*

*Hos cape fatarū comites his mœnia quære.*

Cur non potius Christi Domini serui fideles, gens sancta, genus electum, fortes orthodoxi, pro Dei viui, & veri reuerentia, & honore non sic cogitarint? sudarint? laborarunt?

Imò si pro sanctarum Imaginum cultu, pleraque Concilia celebrata fuere, ut tandem hæresis illa damnaretur. Insuper tot clades, & excidia interfuere iconomachorū inscitia, & impietate grassante, cur pro ea Imagine



circumspectius non utique vigilarent, quæ ab ipso Domino in diebus carnis suæ facta , & transmissa Abagaro, ac deinceps Ecclesiæ Catholicæ semper in Comitijs illis fundamentum celebre , & inconcussum optimarum rationum in eisdem Congregationibus expositarum habebatur ?

Sed externis nequaquam utemur, cum domesticis abundamus exemplis . In taliū quippe profunctorum excidijs Sanctorū Chrysostomi, Nanzianzeni, aliquorum Apostolorum corpora Cōstantinopoli, & à toto ferè Oriente Romam aduenere . Sancti quoque Anastasij Monachi Persæ, eiusque effigies veneranda translata fuit, quæ hætenus ad aquas salvias, Græcis tunc ibi existentibus, asseruatur . Earundem etiam ruinarum occasionebus translatum fuit venerabile caput Sanctissimi Præcursoris Ioannis Baptistæ (nimirum gaudium, & celsitudo Populi Romani, huius thesaurus Ecclesiæ , & illic degentium iubilatio, de cuius translatione peculiarem , inferius subnectimus, enartationem. Harum autem asportationem diuerso tempore factarum testimonia, non tantum Apostolicæ litteræ, historiæq. eloquuntur, sed templa ipsa, oracula, altaria, ijs erecta declarant .

Sanctorum itaque Patrum famulatu sacrosancta Imago pergens ad Urbem patuit impletum illud Canticorum 2. *Venit dilectus saliens in montibus, transiliens colles.* Eo quod Syriæ, atq; Traciæ iugis destitutis, seu Regibus Edessenis, Imperatoribusq. Constantino-  
politani despectis, eminentissimos salijt Catholicorum montium, Romanæ scilicet arcis celsitudinem beatam; cuius fundamenta, sunt in montibus Christi Martyrum sanguine sacratis, vbi intrà candidarum virginum claustra, vt flos in orto bis concluso, & veluti sponsus septus choreis Virginum asseruatur, & colitur. Adeò ut id quod canticum sequitur adimpleuisse videatur.

*En ipse stat post parietem nostrum respiciens  
per fenestras, prospiciens per cancellos.*



*De huiusmodi translationis probatione ob antiquam traditionem acceptam à Græcis Patribus Sanctæ tunc Imaginis in Urbem asportatoribus .*

*Cap. IV.*

**P**II igitur sacrorum pignorum portitores, ac Sanctissimæ Imaginis Romam versus, diuina disponente gratia transfatores, cum essent viri religiosi, ac boni testimonij, eruti vt Lot ab altitudine ventris inferarum hæresiarum, haud petitis deforis literis, & probationibus ( vltimæ necessitatis tunc vrgente periculo ) ipsi per se testati sunt, à quibus, vt fideles Christi Ministri, catholicæ veritatis defensores eximij, & tanquam epistola non scripta atramento, sed signata testimonio cordis in charitate radicati, quas dederant de Imagine traditiones, vt verissimæ habitæ sūt. Et ab ijs qui ad instar quinquaginta fortium ambientium lectulum Salomonis ad sacratissimam assisteabant iconem, sacrarumq. laudum, & oblationum ministerio mediante, interioris facelli vestibula tenebant. Vrbs Roma Imaginis Christi ad Abagarum datæ munus, easq. orthodoxorum traditiones accepit



cepit, Orientalium quoque recognitione, qui eandem, quam Constantinopoli viderant, diuersa postmodum temporis occasione confluentes in Urbem, aspiciebant, tenuit affirmatas.

Huiusmodi Imaginis itaque ab orthodoxis Græcis acceptæ, testimonium dignius, ratioque notissima ipsa est, ad hæc vsque tempora perdurans traditio. Et quidem indecens est de foris probare, id quod suamet duratione clarificatur, continuitateq. commendatur. Enimuerò probabilius est traditionem tenere intermisso ætatum tempore, veridicorum cōsensu ratificatam, quam si pauci essent Auctores, alter alterius in omnibus imitator. Idcirco gloriatur Roma in huius translationis assertione, plures innumerosq. testes habere, non in vnus, aut paucorum relatione instructos, sed transferentium orthodoxorum fundatos traditione, quæ diuerso hominum statu, multipliciq. temporum mutatione, à generatione in generationem vsque adeò fidelis viget, & incōcussa perseuerat. A quo nam per hæc sæcula oppugnata est? aut quando mutata? aut saltem diminuta? vel tandem aliorum atque nunc est, conclamata traditio? non quidem; sed quæ à principio tantæ auctoritatis

tatis sincera effulfit, ipsa & nunc intemerata, manet, & sine hæsitazione probatur.

Etenim miserrimæ suspicionis effet dubitatio si tam pretiosum pignus, si tam insignè faciei Saluatoris monumentum, ab eodem Christo, Abagaro Regi, & per eum Ecclesiæ suæ sponsæ dono datum, à Regibus, & Imperatoribus magno deuotionis ardore percul- tum, à Pontificibus, & Concilijs tantopere commendatum, in necessitatibus vniuersale adiutorium, contra inimicos propugnaculum, in calamitatibus effugium, denique non Orienti tantum, sed toto penè mundo celebrè, & insignè, potius suspicari ammissum, fuisse ex negligentia, quàm attentissimè asser- uatum pro Religione, atque Sacerdotum cus- toditum officijs. Vel in excidijs locorum, & transmigrationibus gentium potius credere immemores illos reliquisse, quàm pietatis stu- dio vigiles secum asportasse. Vbinam intentæ custodum excubiæ? Vbi ministrorum, vel sal- tem vbi populi credentis sincerissima deu- otio? Horum quippe omnium læderet officia, deturparetq. fidem si quis anceps translatio- nem non admitteret illorum.

Verùm huiusmodi fortasse incredulorum torporem, hæsitacionemq. penitus delet, non

inquam talium asportantium, fides, zelusq. sed ipsamet sanctæ Imaginis præsentia, eiusdemq. vetus in hac Ecclesia haud patitur asseruatio, cuius tot sunt testes, quot omni ex parte confluentes deuoti adorant, & adorando confitentur.

Talibus itaque constipata Ministris quamdiù in Oriente existerat, credentibus benefaciendo semper illuxit. Illinc postmodum ob scelera gentium illarum discedendo transmigravit in Urbem. Migravit inquam quia seportantes ipsa portauit, & Romam transmeantes ipsa regebat euntes, faciebatque enimuerò ad longa illa itinera incoiumes, & promptiores.

*De alijs testimonijs hanc circa translationem  
in Urbem, quæ ab huius Ecclesiæ Sancti  
Siluestri monumentis excipiuntur.*

*Cap. V.*

**P**ost argumenta quidem verarum coniecturarum, & traditionum; post Religiosorum Patrum fidelem in dies approbationem, post tandem sacratissimæ Imaginis vultum, & præsentiam semet in omnibus sincerissimè declarantem, pleraque non  
desunt



defunt probationum indicia in hac sancti Siluestri Ecclesia ( admirandæ Imaginis domicilium, & locus . )

Horum quippè primum, quod hæc ipsa Ecclesia à bon. mem. Paulo Papa Primo in Orientalium Græcorum Cœnobium fuerat concessa ( perfidorum namque Imperatorum impio edicto, fideles orthodoxi Orientalium regionum facti extorres sub vniuersalis Pastoris tutela protegendis, Romam pro effugio petiere; quos pro recta fide, ac pro sanctificatione animarum suarum admodum oppressos, clementissimus Pontifex in hac Ecclesia à se nouiter erecta, ac Diuo Siluestro dicata, pietatis etgo conclusit, annuens, vt græcæ psalmodiæ concentu Domino canerent, siue quia expeditior inerat Græcis græcæ linguæ modulatio, siue vt omnium linguis laudaretur Deus, ac ne periret, quod Hester 13. scriptum apparet . *Ne claudas ora canentium te*, porro id permulta adhuc superstita declarant monumenta, nonnullique scripserunt Auctores, nempe Anastasius Bibliothecarius in vita eiusdem Pauli Papæ Primi, & Card. Baronius tom. 8. ann. 761. hac quoque de causa eiusdem Pauli Apostolicæ litteræ pro hac Ecclesia quorundam Græcorum nominum expressione

sione signantur, sed notissima res est, nec longa indiget probatione, ex horum ergo Græcorum commercio, & occasione Monasterij insignia Orientis munera spiritualia (Sanctorum scilicet pignora) translata fuerunt in Urbem *cum habenibus enim Symbolum facilius est transitus*, tum quoque facilis via, ac breuior ex frequētatione meantium, & Constantinopoli Romam, Romaque illuc, vt passim vetustæ memorant historiæ.

Alterum autem magni testimonij vestigium, est antiquus ritus, græcaq. deuotio ab ijs intermissè pro sacratissimæ Imaginis solemnitate obseruatus, quæ in tantæ rei affirmatione, diuina disponente gratia adhuc perseverant. Siquidem die 15. Augusti post vespers pfallentium sanctimonialium processio cum hac Sacratissima Imagine Saluatoris, per claustra Monasterij perducitur. Mos quidem Græcus, & à Græcis illis per traditionem acceptus pro anniuersaria commemoratione translationis huius Sanctissimæ Figuræ, tunc temporis Edeffa in Syria ad Constantinopolitanos Græcos. Quamobrè indictum Augusti diem quotannis pro translatione huiusmodi, isto processionis ritu, ac ordine sicut recolebant in Oriente, ita & percoluerunt in Vrbe,

posterisq. ac cunctis talem tradidere obseruationem. Porrò de hoc translationis, ac pijsimæ solemnitatis monumento Monilogium Græcum affirmat die 16. Augusti. Intermissa igitur tam venerabilis memoriæ celebritas anniuersaria à priscis asportatoribus tantopere continuata, & successoribus præstita, ad venerabiles quoque peruenit Matres, quæ grandi religionis affectu sicut de Domini, & Saluatoris seruitute, cultuque delectantur, ita de antiquioris rei intermisso testimonio hilarescunt.

Istius præterea similitudinem processionis eadem Augusti die imitati sunt fratres hospitalis in Laterano cum Imagine Saluatoris, quæ asseruare dicitur in Capella *Sancta Sanctorum* coeperunt tamē sub Nicolao V. Pont. Max. (vt ex monumentis Archiuij eiusdem Confraternitatis apparet) sed quemadmodum tempus est diuersum, ita dispar est causa, si quidem à Fratribus illis ritus obducitur augustalis triumphus (vt ibi asseritur) commemoratione.

Huius autē Ecclesiæ, idest S. Siluestri, processio vetustior in annis, ac ab Oriente percepta, quam nunc Sanctimoniales obseruant, nonnisi in anniuersariam translationis memoriam



riã huius Sanctissimæ Imaginis ad Abagarum datæ (cum scilicet Edeffa Constantinopolim ad Græcos fuerit eduçta ) ad hæc vsque tempora religiosissimè continuatur .

Nam Græci cum Sacratissima Imagine Romam confluentes , Romæ etiam illius primæ translationis ordinem obseruarunt , siue vt Græcas honorarêt regiones ad quas grandi pompa, & miraculoso itinere translata fuit, siue vt seiplos tanquam eius generationis soboles Occidenti indicarent ; siue vt eandem illam esse indicerent , quæ sæculis elapsis Constantinopolim plenissimo veritatis testimonio fuerit eueçta . At quoque modo id extat ordinatum , illorum prudentiam admirantes elaudamus, nam tali obseruationis studio, & pietate , nobis securum , ac vehemens de Sacratissimæ Imaginis veritate , testimonium præstiteret.

*De multis Auctoribus asserentibus Domini  
Imaginem Abagaro Regi missam, in hac  
S. Siluestri Ecclesia asseruari, de-  
que alijs considerationibus, &  
indicijs . Cap. VI.*

**P**Ræter celeberrimas Orientalium  
Græcorum affirmationes, præter mi-  
rifica traditionis, atque rituum in hac  
Ecclesia obseruatorum, documenta quæ di-  
ximus; nonnulli quoque huiusmodi veritati,  
scriptis suis astipulati sunt auctores. Nam  
ex vetustissimarum historiarum monumentis,  
in hac prædicta S. Siluestri Ecclesia Imaginẽ  
Saluatoris ad Abagarum datam asseruari, te-  
stimonia tradiderunt. Hos inter Card. Baro-  
nius tom. 10. ann. 944. cap. 14. Gonzaga,  
lib. de principio Seraphicæ Religionis in  
Prouincia Romana. Vgonius in historijs sta-  
tionum, in Ecclesia sub tit. S. Siluestri de  
capite. Petrus Martyr lib. de mirabilibus  
Romæ in Ecclesia prædicta; Pancirolus in  
suis thesauris; R. P. Fr. Lucas Vuadingus  
tom. 2. Annalium Minorum anno 1285.

At si ei, quod hætenus proditum est ex  
C di-

dignissimis veridicorum Auctorum affirmationibus, additur quod cernitur oculis, quod secreto noscitur sensu, quod quandoque experientia capitur; laudaabile tunc euadet Iconologiæ testimonium, & effusa erit huiusmodi assertionis edictio; Atque nonnullorum explebitur rursus inquirendi, vel dubitandi anxietas. Tales quippe hæsitantium aliquorum titubationes, sensibilis ratio restinguet, & quod sic redditur probabile: iuuat ad confutandas, quas sola contentio, parturit difficultatēs. Taliter enim Apostolus Philippus, vt Natanielem instrueret, persuadendo adiecit, vt Christum scilicet aspiciendo, confiteatur Saluatorem, quem antea renuerat credere Messiam. *Veni & vide*, ait Ioann. 1.

Attendite igitur, & videte; namque manifestissimum huius rei argumentum, imò præsentis enarrationis fundamentum, ipsamet est Sacrosancta Saluatoris Imago; quæ nimirum ista in Ecclesia Sancti Siluestri asseruatur, & colitur. Aspectu siquidem digno, præsentiaque tanquam diuina, semet indicat, approbat, & docet.

Hæc enim sacratissima Imago, specie admiranda



mirabilis , maiestate grauis , perspicuitate  
sublimis , visu decora , illud repræsentat  
signaculum in quo ( vt Iob 9. legitur ) gratiæ  
quasi stellæ omnes recluduntur . Illicò vt  
aspicitur , non humana arte , sed ope diuina  
expressam , omnis lingua liberè confitetur .  
Pio siquidem affectu , motuque superno , hu-  
manæ haud attribuendo facultati , visum ali-  
quando est , aspicientes non admirari tan-  
tùm ; sed stupore interdum concuti : inter-  
dum vehementi deuotione lætificari . Efful-  
get , enimuerò sanctum quid , quod explica-  
ri non potest ; percipit autem qui deuotè in-  
tuetur .

Testor ipse coram Deo , ex plerisque spe-  
ctatum admissis , hæc me vidisse , & perce-  
pisse , assistentem pro munere meo , dum pe-  
tentibus sacrosancta propè hæc ostendere-  
tur Imago , anno præsertim Iubilæi , peregrin-  
nis scilicet Principibus , Patribus , Religiosisq.  
pietate , ac sapientia in Dei Ecclesia cele-  
berrimis , idem quod de admirabili maiesta-  
te nunc dicitur , cunctos affirmasse . Vt enim  
sacri Vultus præsentia cernitur , extemplò  
reuerentia , compunctioq. spectantibus oriun-  
tur . Itidem contritæ mentis humilitas , ti-

mores in spe, & spei affectus se promunt. Alijs lachrymæ, alijs gaudia de spiritali lætitia prospiciuntur. Testis est ipsamet in dies accepta veritas, omnium confessione probata, omnium vocibus similiter conclamata.

Nonnullorum etiam Patrum, ac insignium Religiosorum huiuscemodi testimonia multipliciter audita, breuitate dimittimus; sanctissimo Iubilæi anno, cum in eorum generalibus comitijs Romam aduenerint, atque ad sacratissimam istâ Domini tenderent adorandam Imaginem. Nec tamen quod ingenuè testabantur, hic non referendo omittimus, cum vbique se prædicaturos admirandum hoc diuini operis fastigium significarint, quoniam talem, tantamque Dei Imaginem digni habiti sunt propè posse intueri. Eorum igitur pijs, verisque prædicationibus apud patrias eorundem Ecclesias, vberissima (quam, quæ hic ocyus dicerentur:) manifesta-  
buntur de hac sicuti viderunt, magniloqua elogia, & laudabilia testimonia.

*De simillima uniformitate sanctę istius Imaginis cum alijs à Christo Domino miraculose efformatis, ac de notabili paritate eiusdem cum relatione auctorum, qui de humano aspectu Domini scripserunt. Cap. VII.*

**Q** Vanquam superioribus Iconologię capitibus, satis abunde pro hac venerabili Saluatoris Imagine fuerit expositum: non adhuc tamen cęptę enarrationis finis interuenit. Non enim humana voce tantum, rationum probationibus indicitur, ut visum est; sed etiam ab alijs Christi Imaginibus ab eodem Domino mirabiliter factis, omninò verificatur. Porro si in ore duorum veritas elucet, multò magis vniformitate trium, & repręsentatione earundem, elucidius, & penetrabile verum potest agnosci.

Harum quippe figurarum (siue quę passionis tempore velo impressa, quod Veronicę fertur, in Basilica Principis Apostolorum conseruatur; siue quę Sudario, vel Syndoni eo-



dem sacræ passionis tempore impressæ. Atque hæc dictarum prima, & Regi Abagaro ab ipsomet Saluatore missa, mirabiliter inter se conformantur aspectus; ea scilicet consimilitudinis æqualitate, vt vnus repræsentati, atque vnus facientis Magistri, testimonium afferre videantur. Nec superest ambigendi locus cum, quod vni inest proprium, hoc itidem alijs circumspici possit. Similitudinis, & vniformitatis istarum tot sunt testes, quot aspiciendo fiunt de veritate præcones. Non mea igitur vox, sed vniuersorum est sententia, cunctorum iudicium, pariterque affirmatio.

Sed inter innumeros istos eminet insigni pietate celeberrimus, Sereniss. P. Mauritius S. R. E. Cardinalis à Sabaudia, proceresque multi secum, deuotionis ergò in hanc S. Siluestri Ecclesiã pergentes, Imaginem hanc Sanctissimam adorandam anno scilicet 1624.

Poterat quippè dicere fideliter, poterant & multi cū illo veraces arbitri esse, nam cum benè prospexerint, & quæ Romæ, & quæ Taurini custoditur, indubitata proinde cōfessionem promere valebant. Et quamuis alijs pergenas sanguis circumspiciatur effusus, ac li-

uor, pallor etiam mortis absideat; at in ista ad Abagarum missa, liuoris, sanguinis, atque palloris vestigia non appareant (quia ante tempus passionis facta reperiiebatur. (Implicito tamen deuoti cordis assensu, & innata, rationalis mentis agnitione) quisque fatetur dictas figuras vnius esse factoris. Et sicut vnum referunt vultum; vnius quoque inter se testantur opus vniforme conditoris; ea scilicet cōparationis, ac similitudinis obseruata concordia, qua plures cognoscuntur ex eodem parente filij procreati, & ex vno artifice varia percreduntur simulacra depicta. Sicut itaque differentes ætate filios, & dispares in multis; hos tamen eodem genitos sanguine, eodemque parente procreatos, quadam intimæ veritatis indagine, atque secretioris vultus natura intuemur. Talia prorsus sic nos cogunt indicia illarum imaginum vnam eundemque fateri cælesti potentia efformatorem. Quinimò multa quandoque simulacra varijs distincta modis & coloribus, ex vno tamen, eodemque perpendimus elaborata esse pictore. Ita de Dominicis istis pro nunc fas est ratiocinari Imaginibus, eoque propensius in nitimur probationum similitudinibus, quo

ex æqualitate harum talis apparet vnitas, effulgetque maiestas, talis omnimodo mirificæ comparationis est æquiformitas, vt humani artificij nequaquam possint vsque adeò confimiliter molimina perpetrari.

Iamque sepositis harum Sanctarum Imaginum conformitatibus, amodo ex multorum Auctorum veridica descriptione, haud spernenda enunciabimus eorundem testimonia. Quemadmodum igitur venerabiles illæ vnitæ cognoscuntur figuræ, ob prospicientiũ deuotorum apprehensionem, proprietatemq. figurarum. Sic qui de Christi Domini effigie in diebus carnis suæ scripserunt, in hac & proprietate rerum, & perscrutatione aspectus maximè reperiuntur.

Venustum quippè, egregiumque Domini Nostri Vultum, viuidam, ac speciosam cælestis, æternique candoris effigiem, quam selectis verbis, sententijsque scripserunt: quasi in ista venerabili Imagine referri videmus. Frontis siquidem serenitas, facies sine ruga, supercilia nigra non perinde inflexa, oculi glauci, & clari, nasus quantum decuit longus, barbæ capillus flauus in medio bifurcatus, aspectus simplex, & maturus; facies nec rotunda nimium,



mium, nec acuta, modicè rubicunda; venustas in vultu, & rubor moderatus, præferens maiestatem, ac multa huiusmodi, quæ memorantur ab antiquis de Christo Domino, prorsus in hac sanctissima Imagine conspiciuntur, & obseruantur. (in alijs autem non sic, quia passionis tempore efformatæ, tormentorum, & mortis, liuoribus asperguntur,) quæ igitur de humano aspectu Domini ab historicis memorantur in ista ad Abagarum missa Imagine pernoscentur.

Tales inter alios auctores sunt, Ioseph lib. 18. antiquitatum. Nicephorus histor. lib. 2. cap. 4. Eutropius quoque historiographus P. Lentulus Proconsul Asiæ in epist. ad Senatum Romanum. Petrus Garzia lib. 8.

institut. Euangelicarum cap. 1. At si

aliquid probatur quando contra-

rium non ostenditur, è ma-

gis si plura concordant,

si docent, si de-

nique con-

testari

videntur: apud omnes probabile

esse deberet, atque

verax.

*De disparitate aliarum humani artificij figurarum, cum hac non manufacta :  
deque talis disparitatis pro nostra affirmatione Imaginis sacrosanctæ.  
Cap. VIII.*

**P**ostremum hoc enarrationis testimonium, atque vltimam de sanctissima Imagine probationem, tanta alacritate producimus, quanta sinceritate percreditur. Ingenuè quidem afferre compellimur, quod apud omnes manifestissimum existens, ambigendi, vel oppugnandi vnquam pariet occasionem. Quamuis enim inter prædictas Domini figuras mira vniformitas adsit, talisque consimilitudo appareat illarum, vt ex vno fas sit credere prodijisse Magistro, ac istam, quæ nobiscum est, cum alijs quoque veram de aspectu Domini retinere æqualitatem (vt capite præcedenti est dictum) tamen reliquæ humano artificio efformatæ, modicam tantummodo semper sustinent comparationem. Artis igitur defectus, industriæq. humanæ

manæ imparitas, testantur opus hoc Imaginis sanctissimæ diuina esse operatione supernum; atque disciplinas, humanasque facultates haud posse prosequi tam altioris Magistri, & potentis Domini operationem.

Nec porro insolita res est, dum idem quotidie innouatur miraculū, cum quo Sanctissima hæc facta fuit à Domino Imago; quin potius ita discernitur vera esse, cum id cum quo primitus agebatur, hætenus sustinetur. Nam vt ex Damasceno habetur lib. 4. citato fidei orthodoxæ. Abagari Regis iussu atque impensis, pictor quidam Christi Vultum depingere studebat, vt æger Rex saltem posset venerabilis faciei similitudine iucundari, cum nondum eiusdem Domini Iesu, vel suorum discipulorū potuisset aspectu dignus esse. At cum pro variabili, & multiplici sacratissimi Vultus Christi splendore, pictor intendere non posset, neque pingere valeret; Iesus aduocans ad se pictorem, sudariolo lineo suæ Vultum maiestatis impressit, ac vt Regi fideliter cupienti immitteret, imperauit. Tale igitur miraculum nunc ex parte innouari reperitur, quia sicut de speciosissima Christi Domini facie nil poterat sumi; nisi hæc quæ  
eius-



eiſdem Domini opere , Domino perſimilis apparuit . Ita ex Sacroſancta hac digniſſima Figura, nulla humane artis perſimilis exprimitur , quæ poſſit , aut valeat cum illa omninò comparari . Quæque imitationes deficiunt, & diſpares euadunt . Nec pro huiuſmodi veritate , aut argumenta depromam, aut rationes extollam . Teſtis eſt ars ipſa, teſtes eiſdem facultatis pictores , quinimò templa , Aedes, Sacella, & Aras, his plerunque exemplis, & Imaginibus decoratas ſcrutando, quiſque percredet .

Porrò admirabile eſt , huius Sanctiſſimæ Imaginis , lineum velum , tempore vetuſtiſſimum contentamque Figuram hucuſque adeò conſeruari ; vt ab excellentibus in arte pictoribus etiam in materia prætioſa, & fulgida haud potuiſſe perfectius effingi . Apelles, Zeuxi, Prothogenes , Phidiæ tandem victi ſunt, ſuperati ſunt, emendati ſunt, vnde ſonat in prouerbum , *quorſum tam multa de Apelle ?* In hac tantum conceditur exemplar quantum iuuat deuotos , non autem vt antecellat eximiam , auguſtiſſimamque hanc à Chriſto factam Iconem .

Sola tamen Liguria conſimili ditari figura,  
eamque

eamque Genuæ dicitur asseruari; haud tamen humana arte , sed miraculo interueniente facta consimilis ; Paulus siquidem in latro nuncupatus, Heremita Sanctissimus in Orientis regione consistens, cum ab Imperatore, & Patriarcha Constantinopolitano obtinuisset , vt per manus eiusdem Patriarchæ, lineum velum ad proportionem Imaginis sanctæ apponeretur; in apposito velo eiusdem faciei lineamentis sacram alteram mirabiliter prodijisse figuram memorant auctores , quos citat Baron. tom. 10. ann. 944. asserit Iacobus Gretser. in Syntagm. de Imaginibus manu non factis . Istam deinceps translata fuisse Genuam, vtique affirmant, vbi admirabili etiam deuotione percolitur . Siue alia non manufacta, Imago Christi, dicta Imago Camulianen. consimili miraculo expressa, de qua idem Gretser. loco citato cap. 15.

Veruntamen sicut canæ parentis, & ex se genitæ filiæ consimilitudinem, sola tamen annorum imparitas diuidit , ac discerni facit vtramque ; Perinde ac si quæ alibi reperiuntur cum hac quæ est Romæ præstabunt, si ambo comparentur insimul .

Romanis siquidē arcibus, in hac scilicet S.  
Sil-

Siluestri Ecclesia custodita, longioris tēporis ordine antiquior; tanquam senili ruga parumper aspersa ob temporum, locorumque mutationes, matrem se testatur alterius recentiori signo, recentiori vultu conspicuæ.

His tamen exceptis miraculo interueniente peractis, cæteræ haud iustinent omnimodam comparationis, & similitudinis paritatem; quam enim cælestis pictor mirabiliter operatus est: humanæ non sufficiunt artes plenius imitari; & quam Christus potenter expressit: nequaquam alius consimiliter valet perpetrare. Id autem cum vniuersorum oculi percipiant, & iudicent; sensusque adminiculo veritas eniteat, haud prosequar longius definitæ apud omnes, ac claræ probationis argumentum.


Sat est hucusque memorata produxisse, tum verustiori solidata testimonio, tum recentioribus adiuta veritatibus. In hac ergo definimus nostræ Iconologiæ peroratione: Christi Domini opus mirabile, idest sui Sacrosanctam Imaginem, ab ipsomet Domino efformatam, & Abagaro Regi transmissam, à sanctæ fidei cultoribus, à Patribus orthodoxis semper conseruatam: post diuersa tem-



porum, locorumque discrimina, tandem Dei  
voluntate, Romæ, & in hac Ecclesia S. Silue-  
stri de Capite reperiri: Sponsisque cir-  
cundatam Virginibus, gratiarum  
quoque mirabilibus ad ho-  
diernum vsque diem  
in Dei glo-  
riam,  
& eiusdem Sanctæ Ima-  
ginis veritatem  
corusca-  
ri.

*DEO GRATIAS.*







1389-862

33236  
DR

